

厚齋易學

四

卷之四

四

四

四

四

四

四

詳校官侍郎臣劉躍雲

通政使司副使臣莫瞻菴覆勘

騰錄監生臣張曾壇

欽定四庫全書

厚齋易學卷六

易輯傳第二

經上篇屯蒙

三

震下
坎上

屯

贊曰剛柔始交而難生

雜卦曰屯見而不失其居

宋 馮椅 撰

李季辨曰天地交而雷雨興天地晦冥難作而未明之象

張舜元曰乾之氣下交於坤其卦為坎萬物始生於黃泉之宮其物向上於象為震尚為坎之寒氣之所難盤屈地下而未達此所以為屯也

林黃中曰天地交為泰交之始九五在上六二在下是以屯也

按易之例二陽四陰之卦則論二陽之升降陽畫

在下則以兌在內起例陽畫在上則以巽在外起
例此卦初九陽畫在下則二當為九卦體為臨則
剛浸長而四陰不能為難今九升於五而陷於二
陰反為坎險震動而上則遇之此其所以屯也九
五陽畫在上則上當為九卦體為觀則上能助五
以正君位為下四陰之所仰望今九降於初則九
五為陰所陷而初勢相遠不能助援此亦其所以
屯也孔子之傳論剛柔之始交而未暇及此自隨

以後乃始言之故得以發其所未言

楊廷秀曰氣始交未暢曰屯物勾萌未舒曰屯世

多難未泰曰屯

詳見上
三條

郭立之曰天地無屯人與萬物皆有之故為人道之始

蘭惠卿曰形質具而未生物生之屯也事業備而未行行事之屯也德澤積而未布膏澤之屯也

鄭少梅曰坎中之一陽心君也震下之一陽志帥

也善持志者必悟此象

右明卦義

象贊曰雲雷屯君子以經綸

案此即動乎險中之意

右明卦用

毛伯玉曰天地始判則為屯屯者生民之初所以
次乾坤也

李氏曰自此以往其用无窮而卦各以序成其後矣

李子思曰乾坤之後次以屯蒙此乾坤以生育之

功付之三子也

屯震下坎上
蒙坎下艮上

王景孟曰屯初建侯蒙二克家蓋謂是也

郭子和曰易為三材之書然人道雜而多端无天地之純全故純剛為乾而天道盡純柔為坤而地道盡所以為易簡至於屯至未濟共為人道以配乾坤

右明卦序

元亨利貞

贊曰動乎險中大亨貞

李仲永曰物之始生皆具四端

李子思曰震之一陽初來為主出為亨利而卒歸於正故傳曰大亨貞陽為大大者元也四德與乾同長子肖父故也

郭立之曰四德非一於屯也屯之所得者屯之時與屯之事而已

案屯繼乾坤之後得之一再索之初猶水之去源

未遠也故四德具焉

程可久曰震初九元之象也二五相應亨之象也各當其位利貞之象也

程正叔曰處屯有致亨之道其唯貞乎能守正不變者鮮矣

案震之一陽元也上通坎中之陽亨也九五當位利貞也

毛伯玉曰方天地之始判也民生其間羣然无主

紛拏相搏屯也久而漸有所歸所謂元亨利貞也
此以天地之初言之

右明卦象

勿用有攸往利建侯

贊曰雷雨之動滿盈天造草昧宜建侯而不寧

正義曰此二句以人事釋屯之義

都聖與曰以爻言之陽在一卦之內有不能往之
義而於體為震有犯難而往之象故有勿用有攸往

之辭焉

趙氏曰震動于下而坎險陷之深以輕犯難為戒
此明勿用有攸往凡文之般桓亶如皆勿用有
攸往之義

都聖與曰一陽在內為衆陰之主而震有驚百里
之義故有利建侯之辭

呂與叔曰利建侯各付其所主也

楊中立曰建侯所以自輔也使人各有主而天下

定矣

朱子發曰天造草昧人思其主能乘時衆建諸侯使人人各歸以事主誰與為亂哉

郭立之曰厥初生民无羽毛以蔽其身无爪牙以充其欲則必求其羣而比焉勢又不足則必求其彊且大者而比焉此后王君公之所由立也

此明利建侯

毛伯玉曰於斯時也民利於得主无主則屯彼有

主矣安用往也

程可久曰險在前故勿用有攸往初未履位故利建侯

馮當可曰唯多助乃可濟屯勿用有攸往者不可獨往唯建侯求助有可濟之理

案大抵以震之一陽動於下乘人之思主就以立之則各安其分而足以為我之輔矣不然決非安於屯而不動者也彖曰勿用有攸往爻曰利居貞聖

人之戒不亦深切而著明矣乎

李子思曰封建要以親親相繼為義當自太子始震以一陽在下出而當監國撫軍之任以解屯者也

或曰是亦可以占乎曰洪範稽疑三人占則從二人之言左氏所載多出於文王系辭之外顧所筮何如耳

右明卦占